

Rejhana Dervišević

Sarajevo, 16.02.2026.

**PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM
n/r predsjedavajućeg**

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO: 16-02-2026			
Organizaciona jedinica	Klasifikaciona oznaka	Redni broj	Broj priloga
01-	50-1-	576	26

PREDMET: Poslaničko pitanje

U skladu s čl. 166. i 170. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20, 53/22, 59/23, 87/23, 50/24, 73/24, 56/25 i 7/26), postavljam sljedeće poslaničko pitanje:

Koje je vaše mišljenje o izmjeni i dopuni propisa iz oblasti indirektnog oporezivanja, a posebno Zakona o porezu na dodatu vrijednost, kao i carinskih propisa, u dijelu koji se odnosi na oslobađanje od PDV-a, povrat PDV-a te oslobađanje od plaćanja carina za ortopedska, tiflotehnička i surdoaudiološka pomagala namijenjena licima s invaliditetom?

Obrazloženje:

U skladu sa odredbama Konvencije Ujedinjenih nacija o pravima osoba s invaliditetom, koju je Bosna i Hercegovina ratifikovala i time se obavezala da osigura uslove u kojima osobe s invaliditetom mogu uživati jednaka prava i mogućnosti u društvu, Bosna i Hercegovina preuzela je obavezu ne samo formalnog usklađivanja propisa, nego i obavezu osiguravanja praktične dostupnosti pomagala koja omogućavaju kretanje, komunikaciju, obrazovanje, pristup radu i samostalan život lica s invaliditetom, bez zavisnosti od drugih osoba.

Izmjene imaju za cilj da se ortopedska, tiflotehnička i surdoaudiološka pomagala, koja se nalaze u važećoj listi pomagala Agencije za lijekove i medicinska sredstva Bosne i Hercegovine, oslobode od plaćanja carina prilikom uvoza, kada ih uvoze fizička lica za ličnu upotrebu, kao i ustanove, organizacije ili udruženja koja se bave zaštitom, obrazovanjem, rehabilitacijom ili pružanjem pomoći licima s invaliditetom.

Istovremeno, predložilo bi se da navedena pomagala budu obuhvaćena oslobađanjem od PDV-a pri uvozu, odnosno povratom PDV-a, čime bi se dodatno smanjilo finansijsko opterećenje korisnika ovih neophodnih sredstava.

Oba prijedloga su ciljano usmjerena na posebno ranjivu društvenu kategoriju i odnose se isključivo na namjenska medicinska i rehabilitaciona pomagala. Ne radi se o opštem poreskom oslobađanju, već o socijalnoj mjeri utemeljenoj na međunarodnim obavezama države prema osobama s invaliditetom.

Prijedlozi su u skladu s obavezama Bosne i Hercegovine proisteklim iz Konvencije Ujedinjenih nacija o pravima osoba s invaliditetom, posebno u dijelu koji se odnosi na osiguravanje pristupa

pomagalima koja omogućavaju mobilnost, komunikaciju, obrazovanje i učešće u društvenom životu.

Imajući u vidu socio-ekonomski položaj velikog broja osoba s invaliditetom, kao i činjenicu da se značajan dio navedenih pomagala nabavlja putem uvoza, smatram da bi ovakvo normativno rješenje imalo direktan i mjerljiv pozitivan efekat na dostupnost pomagala i unapređenje kvaliteta života ove populacije.

Iako prijedlozi imaju ograničen neposredni fiskalni trošak, dugoročno zasigurno mogu doprinijeti smanjenju troškova zdravstvene i socijalne zaštite, većoj uključenosti osoba s invaliditetom u obrazovanje i tržište rada, te smanjenju zavisnosti od socijalnih davanja. Time se ostvaruju posredne uštede za javne budžete.

Primjena prijedloga se može osloniti na postojeće procedure Uprave za indirektno oporezivanje i carinskih organa, uz minimalne prilagodbe u pogledu prepoznavanja proizvoda sa važeće liste i verifikacije korisnika, za šta nisu potrebne nove administrativne strukture.

Smatram da bi stručno mišljenje i podrška Uprave za indirektno oporezivanje Bosne i Hercegovine ovom prijedlogu imali izuzetan značaj u daljoj zakonodavnoj proceduri, te bi predstavljali važan doprinos unapređenju socijalne osjetljivosti poreskog i carinskog sistema Bosne i Hercegovine.

Stoga vas molim da razmotrite navedene prijedloge te da, u okviru svojih nadležnosti, dostavite vaše mišljenje.

Pitanje postavljam: direktoru Uprave za indirektno oporezivanje Bosne i Hercegovine.

S poštovanjem,

POTPIS POSLANIKA/CE


Rejhana Dervišević